

Кондак 1

Взбранней Воеводе, Заступнице рода христианского дарованней Богом на спасение рода человеческого благодарственное приносим Ти, Богородице, пение. Ты же яко всемилостивая Мати милосердия всех нас милуй, заступай и спасай, да зовем Ти:

Радуйся, земли Российския Заступнице, вразумляющая нас и на путь спасения наставляющая.

Икос 1

Ангел во плоти бысть первозданный человек, славою и честию венчанный и малым чим от Ангел умаленный, гордынею же и преслушанием Творца и Создателя своего по прелести диавола на тяжкия труды и скорби из рая изгнанный. Недугуя тою же гордынею, повергающе нас в пучину бед и скорбей, к кому прибегнем, аще не к Тебе, единой Матери милосердия и спасения погибающих. Виждь наши беды и напасти, имиже лукавый враг хочет нас погубити. Но Ты, Пречистая, препни его злостное коварство, да избавльшися славим Тя, твердую Заступницу, и радуящиеся вопием Ти:

Радуйся, от начала веков во главизну нашего спасения предызбранная.

Радуйся, светоносная палато, Владыце уготованная.

Радуйся, неплоднаго корене благоплодное прозябение.

Радуйся, от младенчества Богу посвященная.

Радуйся, во святем храме воспитанная.

Радуйся, всеми добродетельми преукрашенная.

Радуйся, Богоизбранная Отроковице.

Радуйся, израстившая нам плод живота.

Радуйся, земли Российския Заступнице, вразумляющая нас и на путь спасения наставляющая.

Кондак 2

Видящи Тя, благосердая Мати, в пречудней иконе Твоей якоже сущу с нами, страждущи в неисцельнем недуге людие со слезами и верою припадают к ней, лобызающе ю и чающе от Тебе великия и богатия милости. Тем же исцеление улучивше, велегласно вопиют Богу: Аллилуиа.

Икос 2

Разум богопросвещен благодатию получивши от чудных Твоя иконы, исцелевшии всем людем проповедаша о чудесех, явленных от святых иконы сея, да вси притекают к ней с верою и приемлюще скорая исцеления прославляют Тя, взывающе:

Радуйся, яко Тобою возсия свет миру.

Радуйся, яко призре Господь на смирение Рабы Своея.

Радуйся, се бо ублажат Тя вси роди.

Радуйся, яко сотвори Тебе величие Сильный.

Радуйся, Сыну Божию плоть заимодавшая.

Радуйся, Бога с человеки соединившая.

Радуйся, паче всех святых миру благодееющая.

Радуйся, благодатию Божиею и нас освящающая.

Радуйся, земли Российския Заступнице, вразумляющая нас и на путь спасения наставляющая.

Кондак 3

Силу и величие Твое, Богомати, мир весь проповедует, славит Тя наипаче страна Российская немолчно, ликуют обители и храмы святии, святителей лик воспеваает Тя присно, монаси и мирстии к иконе Твоей припадают и хор земнородных согласно взывает: не забуди всех нас, Всепетая Дево, мир мирови даруй и в скорби обрадуй, всем радость пошли и воплю нашему вонми, да с небожителями купно воззовем вси Небесному Богу: Аллилуиа.

Икос 3

Имея промышление о людех земли Российския, благоволила еси, Владычице, устроить в веси Балыкинской храм яко тихое пристанище страждущим в мире сем и посвятити оный имени верного служителя Святыя Троицы, теплаго молитвенника Христова святителя Николая, и даровала ему яко щит и ограждение святую икону Свою, да вси утружденнии скорбию и бурями житейскими прибегают к цельбоносному образу сему, яко к Самей Тебе сущей, вознося благохваления сицевая:

Радуйся, купино, законоположником предзрима.

Радуйся, столпе огненный, наставляяй сущия во тьме.

Радуйся, лестнице, досягающая до небес, еуже сниде Бог.

Радуйся, мосте, преводяй сущих от земли к небеси.

Радуйся, отчаянных из глубины зол исхищающая.

Радуйся, молние, души просвещающая.

Радуйся, верных смыслы озаряющая.

Радуйся, звездо, путь нам во тьме указующая.

Радуйся, земли Российския Заступнице, вразумляющая нас и на путь спасения наставляющая.

Кондак 4

Бурю внутри имея помышлений сумнительных, Тимофей Дульский смятесе, зря родом его святочтимую икону Богоматере, источившую слезы в день брани свейския, страхом бысть одержим и с молитвою слезоточаще обеща отдати икону Твою, Владычице, в новозданный храм; исполнь же волю Пречистыя, с радостию возопи: Аллилуиа.

Икос 4

Слыша Елисавет целование Твое, пришедшей убо Тебе во град Иудов, и исполнися Духа Святаго и возопи гласом велиим и рече: «Откуда мне сие, да прииде Мати Господа моего ко мне?» О, Пречистая Дево, посети и нас, немощных и убогих, и вознеси воздыхания наша, яко дым кадильный, ко Престолу Всевышняго, да от полноты благодарного сердца поем Тебе сице:

Радуйся, одушевленный Престоле Вседержителя.

Радуйся, чертоже безсеменного уневещения.

Радуйся, праведным душам утверждение.

Радуйся, Ангельским чином славо и поклонение.

Радуйся, источнице жизни и бессмертия.

Радуйся, заре таинственного дне.

Радуйся, яко Тобою душам нашим утешение получаем.

Радуйся, яко во успении Твоем залог бессмертия обретаем.

Радуйся, земли Российския Заступнице, вразумляющая нас и

на путь спасения наставляющая.

Кондак 5

Боготечная звезда явися икона Твоя, Богомати, всю страну нашу озаряючи и сущих во тьме невежества светом боговедения просвещаючи, скорбящих радостью осияваючи, заблудших же на путь делания заповедей Сына Твоего и Бога наставляючи. Ему же благодарственне вопием: Аллилуиа.

Икос 5

Видяще, яко возсияла еси в пречестней иконе Твоей, Дево Богородице, свет спасения всем, блуждающим во тьме грехов и страстей, и сию цельбоносную икону даровала еси храму сему и веси сей, молимся пред нею с верою: скорую помощь Твою подаждь вопиющим Ти таковая:

Радуйся, Мати Божия, прошения болящих приемлющая.

Радуйся, Целительнице, недуги благодатию исцеляющая.

Радуйся, Всемиловитая, спасение от Бога являющая.

Радуйся, Всещедрая, Своими щедротами нас одаряющая.

Радуйся, младенцев охранение.

Радуйся, юных наставление.

Радуйся, в разуме нас просвещающая.

Радуйся, гордыню и самомнение от нас отгоняющая.

Радуйся, земли Российския Заступнице, вразумляющая нас и на путь спасения наставляющая.

Кондак 6

Проповедь любви, кротости и всепрощения миру возвещающая, со Христом Сыном Твоим вся горести земныя претерпевшая, апостола Иоанна и с ним весь род христианский Своему материнскому сердцу усыновившая, Приснодево Пренепорочная, не отвержи и нас, во тьме грехов сущих и утешения материнскаго требующих, да с благодарением Господу зовем: Аллилуиа.

Икос 6

Возсиявшу свету богопознания явлением иконы Твоея Балыкинския, свет веры возжещи благоволила еси, Богомати, в земли Северстей во дни нашествия свейскаго, да вси людие. избавлении Тобою от скорби, пленения и смерти, непрестанно вопиют Ти:

Радуйся, Радосте наша безконечная.

Радуйся, светлая отрадо сердечная.

Радуйся, странным прибежище.

Радуйся, сирым приютелище.

Радуйся, печалей наших утешение.

Радуйся, в скорбех наше утешение.

Радуйся, обидимым Покровительнице.

Радуйся, от пленения и смерти избавительнице.

Радуйся, земли Российския Заступнице, вразумляющая нас и на путь спасения наставляющая.

Кондак 7

Хотя отъити от града Чернигова в пределы Сибирстии

святитель чудный Иоанн Тобольский дарова пречестную икону Твою, именуемую Балыкинская, сестрам новосозданным обители Орловския, да почиет на ней благословение Царицы Небесная, Ей же и обитель та посвящена бысть. Они же приимше чудоточный дар дивнаго святителя, образу Твоему с любовью поклоняшася, Богу же воспеша: Аллилуиа.

Икос 7

Новую показующи тварь, возсияла еси всей вселенной яко дивный храм Божий, исполненный Божественныя славы и благодати. О, Дево Марие Пречистая, Царице Небесная человеков и Ангелов, апостолов и мучеников, возсияй и нам путеводною звездою во мраке скорбных дней наших, возвесели сердца наша, во уныние поверженных, просвети умы наша, тьмою отчаяния объята, возстави силы наша, от скорби изсякающия, умножи веру нашу, укрепи надежду нашу и согрей огнем пламенных любви ожесточенныя и озлобленныя души наша, да зряще Тя, на небесех нам внемлющую, молитвенно зовем Ти сице:

Радуйся, непостыдное наше упование.

Радуйся, несокрушимое веры утверждение.

Радуйся, незаходима заре истины.

Радуйся, света неизреченнаго Таиннице.

Радуйся, земное бытие освящающая.

Радуйся, путеводная звезда, нас к правде Божией направляющая.

Радуйся, едина благословенная, скорбный наш мир в печали посещающая.

Радуйся, двери покаяния и спасения нам отверзающая.

Радуйся, земли Российския Заступнице, вразумляющая нас и на путь спасения наставляющая.

Кондак 8

Чудеса и милости Твоя, Препоблагословенная Мати Господа нашего, проповедует земля Российская и светло красуется многими чудотворными Твоими иконами, посреде коих икона Твоя Балыкинская, яко луна полная, лучами чудес немерцаемо сияет, просвещая души наша светом Божия благодати и подвизая нас хвалебно зывати прославльшему Тя Триединому Богу: Аллилуиа.

Икос 8

Всяк земнородный да възиграется, духом просвещаем от цельбоносных святых Твоя, Радосте наша и похвало. Не умолчим никогда силы Твоя глаголати, аще и недостойни есмы пред величеством славы Твоея, обаче приими сицевыя от нас из глубины души возносимыя хвалы:

Радуйся, Молебнице теплая, Судию всех умилоостивляющая.

Радуйся, заблудших от пути истины к покаянию призывающая.

Радуйся, Хранительнице наша, в настоящем вѣсѣ охраняющая.

Радуйся, Предстательнице, в будущем присно ходатайствующая.

Радуйся, жестокость сердца благодатию Твоею умягчающая.

Радуйся, чистым и благим сердцем познавати Тя научающая.

Радуйся, приносящая Сыну Твоему верных моления.

Радуйся, яко Сама еси наше пред Богом заступление.
Радуйся, земли Российския Заступнице, вразумляющая нас и на путь спасения наставляющая.

Кондак 9

Всем нам подобает явиться пред Судищем Христовым, да примет кийждо по делом своим, или благая или злая. Како явлюся тамо, како отвечаю Безсмертному Царю, коим дерзновением воззрю на Судию, блудный аз? О, Мати милосердия и Взыскание погибших! На спасения стези настави мя, Богородице, и в день Суда явися, Владычице, и предстани ми, муки и огня свободящи, да спасен Тобою воспою Твою необоримую благодать и принесу благодарственно хвалебную песнь Богу: Аллилуиа.

Икос 9

Ветии многовещании, святым Псалмопевцем нарицаемии безумнии, рекут: несть Бога, несть души у человека, несть Промысла Божия, и прочия безумныя глаголы, не памятуя неисчетных милостей Творца и Создателя своего, дающего нам всем день и ночь, пищу и питье, дыхание и жизнь и всякое бытие, о Нем же мы вси движемся и живем. Уповающи токмо на разум человеческий, тщетно ищут благобытия своего. Мы же не надеемся на князи, на сыны человеческия, но все упование свое возлагаем на Сына Твоего, Богородице, яко Той есть спасение наше, да не постыдимся. Ты же, о Мати Божия, помози нам веры наша светильницы донести до конца негасимыми, да во умилении сердца вопием Ти:

Радуйся, пагубных учений низложение.
Радуйся, неверия, ересей и расколов искоренение.
Радуйся, зловерия явное обличение.
Радуйся, заблуждающихся доброе вразумление.
Радуйся, от прелести и обольщения наше охранение.
Радуйся, в православной вере наше утверждение.
Радуйся, демонския полки побеждающая.
Радуйся, путем спасительным шествовати помогающая.
Радуйся, земли Российския Заступнице, вразумляющая нас и на путь спасения наставляющая.

Кондак 10

Спасти хотя многия люди от бед и скорбей, источаеши, Богомати, неоскудный источник милости от Своея иконы роду нашему и всем с верою и любовью покланяющимся Тебе скорое вспоможение подаеши. Во святем храме сем благодати струи от иконы Твоея испущаеши, всем чтущим Тя полезное прошение исполняеши. Тем же прославляя Бога, давшаго нам благодать таковую, вопием Ему: Аллилуиа.

Икос 10

Стену и помощь, покров и защищение даровала еси Балыкинскую икону Твою, Владычице, Орловской обители инокинь, внегда благоволила еси, минувшу гонению, возвратити ю на место, идеже пребывала прежде даже до лютаго разорения. Сестры же обители тоя и вси людие, приимше Тя яко печальным утешение, скорбящим радование и отчаянным надежду, благодарне прославиша

Тя сие:

Радуйся, святую икону дати нам изволившая.
Радуйся, любовь Твою к обители сей показавшая.
Радуйся, житие иноческое устроившая.
Радуйся, благословение образом Твоим подающая.
Радуйся, во всяких нуждах скорое вспоможение.
Радуйся, в печалех быстрое утешение.
Радуйся, оставленных врачами на Свои руке приемлющая.
Радуйся, скорбь их на радость претворяющая.
Радуйся, земли Российския Заступнице, вразумляющая нас и на путь спасения наставляющая.

Кондак 11

Пение всеумиленное приносим Ти, раби Твои, Богородице, яко всемогущей Заступнице рода нашего: утоли болезни многовоздыхающих душ наших, укроти гнев Божий, праведно на ны движимый грех ради наших, избави нас от всякия лютыя скорби и болезни, вопиющих о Тебе Богу: Аллилуиа.

Икос 11

Светопреемную свещу, сущим во тьме бед являющуюся, зрим святую икону Богоматери; невещественный бо огонь благодати приемлющи, лучами чудес всех озаряет, научая сие звать Благословенней:

Радуйся, оклеветанных оправдание.
Радуйся, обидимых защищение.
Радуйся, тела моего врачевание.
Радуйся, души моя спасение.
Радуйся, сильным Твоим заступлением от бед избавляющая.
Радуйся, от глада и напрасныя смерти свободящая.
Радуйся, от огня, меча и нашествия иноплемennых сохраняющая.
Радуйся, от язвы и всегубительства смертнаго ограждающая.
Радуйся, земли Российския Заступнице, вразумляющая нас и на путь спасения наставляющая.

Кондак 12

Благодать приявшая от Бога Сына Твоего, Дево Богородице, и ту изливающая на всех к образу Твоему с верою притекающих, не лиши и нас ныне богатия Твоя милости, даруй нам покаяние о гресех, да чистым сердцем и усты зываем к возлюбленному Сыну Твоему и Богу нашему: Аллилуиа.

Икос 12

Поюще Твоя милости и чудеса, хвалим Тя вси, Богородице, и яко древний Израиль к кивоту завета притекаем ко образу Твоему и из глубины души вопием: воздвигни руке к Сыну Твоему, да подаст нам вся благая и спасительная, с верою и любовью вопиющим Ти:

Радуйся, Боголюбивая Царице Богородице.
Радуйся, помощи тепло молящихся Тебе.
Радуйся, скорбящих Радосте и погибших Взыскание.
Радуйся, всего мира надежду и утешение.
Радуйся, нечаянную радость подавающая.

Радуйся, иконою Твоею нам присно помогающая.
Радуйся, прошения наша во благо исполняющая.
Радуйся, от иконы Твоея милости нам источающая.
Радуйся, земли Российския Заступнице, вразумляющая нас и на путь спасения наставляющая.

Кондак 13

О, Всепетая Мати, Небесная Царице и Владычице, Дево Богородице, Споручнице грешных, ненадежных надеяние, отчаянных и погибающих спасение. Ты в напастех и скорбех милостивно защищаеши, в тяжких болезнях исцеляеши всех под честный Твой покров прибегающих. Приими, Пречистая, нынешнее малое приносимое Тебе моление, утоли наша печали и избави нас от всяких зол, напастей, бед, скорбей и вечного осуждения; да не погибнем во отчаянии нашем, но спасеннии Тобою присно Богу вопием: Аллилуиа.

Этот кондак читается трижды, затем икос 1-й и кондак 1-й

Молитва Пресвятой Богородице пред чудотворной Ея иконой, именуемой «Балыкинская»

О, Мати Божия, некогда от нашествия иноверных свеев в велицей беде Отечеству нашему бывшу, явила еси всемогущее заступление прославлением в стране Северстей всечестного образа Твоего, именуемого Балыкинским, и зримыми на нем слезами очес Твоих умолила Сына Твоего и Бога нашего даровати Православным Христианом преславную победу и одоление на супостаты. Ты, Премилосердная Мати, и в мимошедшия дни во граде Орле пред Пречистым образом Твоим даровала исцеление страждущей от духа нечистого девице, возвратив ю родителям здраву и невредиму. Ты, скорая Помощнице в бедах человеческих, услышала вопль матери детища, с высоты жилища внезапно спадша, и возставила е здраву и безвредно. Ты, неизсякаемый источник чудес и щедрот, принесенной к дивному образу Твоему отроковице зело разслабленной благоизволила даровати скорое исцеление, укрепив плесне ея к желанному хождению. Ты, всемогущая Царице неба и земли, воздвигла от неисцельного недуга младенцев, их же родители притекоша к Тебе с верою и любовью. Ты, Подательнице мира душам нашим, избавила юношу от свирепеющих страстей и преклонила злонравие его ко благонравию и покорению родителям. Ты неоскудно изливала струи Своей милости на всех, притекающих к пресвятому образу Твоему в душевных скорбех, телесных недугах и житейских напастех. Вонми, о Всеблагая, и нынешнему усердному молению нашему: управи пути земного странствия нашего к мирному и благодетельному житию, украси жительство наше благими обычаи, загради всесильною дланию Твоею уста лжеучителей, вздымающихся на Разум Божий, тлящих обычаи православных предков наших и развращающих умы и сердца юных чад наших, пошли нам во все дни жития нашего имети чистоту помыслов и сердечных движений. Сама, о Всепетая, заступи и имже веси судьбами спаси и введи нас в прерадостныя обители Сына Твоего и Бога нашего. Аминь.

Молитва иная

О Владычице, Царице Небесная, Ты явила еси милосердие

Свое прославлением во области Северстей всечестнаго лика Твоего, именуемаго Балыкинским и отвратила еси праведный гнев и прещение сына Твоего и Бога нашего от отечества Российскаго, некогда близ погибели бывшего в нашествие полчищ свейских. Видящи скорбь верных чад Православной Церкви, Ты, сердобольная Мати, пролила еси видимыя слезы о страждущем народе нашем. Ты укротила еси мор людей и язю скотов. Ты уврачевала душевныя и телесныя раны пораненной жены. Ты даровала прозрение отроковице. Ты возставила от лютаго недуга всеми оставленную в болезни. Ты исхитила из когтей велиара девицу. Ты и поныне неоскудно изливаеши струи милостей и щедрот Твоих всем прибегающим с несумненною верою в Твою всесильную помощь. Вонми ныне молению нашему, управи пути земнаго скитания и даруй тихое и безмятежное пристанище по преставлении нашем. Украси нашу жизнь добрыми и благочестивыми обычаи. Удержи Твоею всесильною дланию лжепророков и лжеучителей, вздымающихся на разум Божий. Пошли нам чистоту помышлений, просвети очи сердечныя ко зрению спасения и обнови нас благодатию Своея милости. О, Госпоже Пречистая, слезы не довлеют во еже загладити множество прегрешений наших. Ободри нас, укрепи и веда, аможе хочещи. Аминь.

Молитва третья

О, Пресвятая Владычице, Пречистая Дево Богородице, Господа Бога моего Иисуса Христа Мати, припадаю и молюся Тебе яко Матери Царевой, предначиная к Тебе недостойное сие моление, еже приемши, о Мати Царя Небесе и земли, принеси к Царю царствующих, всех Господу, Сыну Твоему и Богу, и прощение всем согрешением моим испроси, житию моему подаждь исправление и на кончине от воздушных врагов немязежное прошествие; Царствия Божественный вход отверсти исходатайствуй ми, и тамо райския пищи наслаждения, горняго онаго града вышняго прекраснаго Иерусалима веселия и неизреченных того красот, светлости же трисианнаго Троичнаго света и сладкаго гласа Ангельских пеней наслаждаться; ея же славы и радости наследника мя и святым всем сопричастника сотвори: вся бо можещи, яко Мати Царя Всемогущаго. И ныне убо, изряднее же в час сей услыши мя, Всемиловитая Владычице, предстояща Ти, вонми, Госпоже Царице, молебное пение приносящу Ти, и вопиюще Богу и Владыце всех: Слава Тебе, Боже, во веки. Аминь.

Тропарь Пресвятой Богородице ради чудотворной Ея иконы, именуемой «Балыкинская»

Тропарь, глас 4:

Заступнице земли Российския от нашествия Свейскаго и непрестанная за нас Молитвеннице, мир земли и душам нашим у Господа испроси, да святится в нас имя Божие во веки.

Кондак, глас 4:

Притецем вси, ближнии и дальнии к Балыкинскому чудотворному образу Божия Матери и умиленно возопиим: Радуйся, земли Российския Заступнице от Свейскаго нашествия и всем притекающим к Тебе Помощнице!

Величание

Величаем Тя, Пресвятая Дево, Богоизбранная Отроковице, и
чтим образ Твой святой, имже точиши исцеления всем с верою
притекающим.